

nangan juga bagi kaum wanita seluruhnya....

**HAJAH FATIMAH HAJI TAMBI OIK** berasal dari Masjid Tanah Melaka. Beliau baru berusia 33 tahun dan bertugas di Hospital Besar Kuala Lumpur.

Telah 12 tahun beliau mengasah pengetahuan dalam bidang silat.

Minat mula bertunas ketika melihat suami begitu tekun belajar silat di Kampung Pandan. Usianya begitu muda. Inai belum pudar dari jari.

Katanya: "Masa saya baru belajar dulu, ramai wanita. Tapi kebanyakannya hanya 'hangat-hangat tahi ayam'. Bila dah kahwin, minat mulai pudar. Mungkin suami tak izinkan.

### Pusaka 22 DEC 1982

"Saya bertumbuh sebar sealiran rasa dengan suami. Kami sama-sama mengisi dada dengan kesenian pusaka. Dia tak keberatan melepaskan saya belajar — malah dia sebagai 'suara' pendorong yang kuat. Tanpa galakan darinya, mungkin saya kurang tabah untuk menghadapi semua cabaran...."

Suami Hajah Fatimah, Haji Yusuf Rashid, adalah pendokong seni Silat Lincak yang tidak asing lagi....

Pendapat Hajah Fatimah, kaum wanita sepatutnya memandang berat tentang ilmu-ilmu mempertahankan diri.

Wanita kini tidak lagi terkurung dalam rumah saja. Mereka sama-sama memikul tanggungjawab membangun masyarakat. Kerja mereka tidak sekadar 'menanak' nasi saja. Bermacam cabaran serta dugaan merintang jalan. Silap-silap langkah akan terjerumus ke jurang yang memang tidak mencecah dataran-nya....

"Tugas saya kadang-kadang sampai malam. Saya rasa 'selamat' kalau kita tahu sedikit sebanyak 'rahsia' mempertahankan diri. Bukan kita minta yang buruk, tapi... kata orang, lebih

baik bersedia sebelum terjadi.

"Dunia sekarang tidak seperti dulu. Musuh tak dapat kita kenal. Jenayah berlaku tak kira waktu atau tempat. Kalau tahu selangkah dua, gerun juga orang nak kalaupun...." ujar Hajah Fatimah sambil tersenyum.

"Seni silat juga sebagai 'pengadang' kepada kaum wanita. Ia adalah ilmu yang dapat mengawal tingkah laku serta mendisiplinkan perwatakan seseorang. Kalau murid itu patuh dengan ilmu yang dituntut, ia pasti memelihara diri dengan baik agar tidak cela 'isi' di dada.

Enam bulan beliau 'berguru'. Masih ingat lagi pahit getir menimpa diri. "Seluruh badan bagai digelek stim rol..." katanya, berjenaka.

Tapi, alah bisa tegal biasa... Segalanya luput jua.

"Ketika dalam menuntut, memang banyak pantang-larangnya. Itu dah memang biasa. Bukan susah sangat, sebab dia hanya menegah diri dari melakukan perkara-perkara yang tak baik...."

### Menduga

"Bagi saya, saat penentuan ialah pada hari tamat menuntut. Masa itulah Mahaguru menduga sejauh mana keyakinan serta setakat mana kesan ilmu yang dipelajari. Tubuh badan disintuk-li-mau. Kemudian kami dipanggil untuk diuji — macam peperiksaan... Macam-macam cubaan. Kena penumbuk; dibelash dengan kayu; hujung keris pun pernah mencecah tubuh. Seram juga. Tapi, kalau kita yakin dan hajat kita tak menyelerong, memang tidak menjadi hal.

"Masa belajar dulu, saya kerap beregu dengan lelaki. Memang lebih cepat kita belajar, lebih cekap. Tak boleh terus berlatih dengan kaum sejenis saja, sebab musuh bukan semuanya lemah-lemah. Terpaksalah membiasakan diri berhadapan dengan berbagai 'rupa' lawan...."

"Lulus' saja ilmu yang

dituntut, Hajah Fatimah melatih seramai 40 orang murid di gelanggang Sentul.

Kini tugas beliau berubah corak. Kalau dalam bidang perguruan biasa, mungkin beliau dikenali sebagai 'Guru Pelawat'. Itulah tugas beliau sekarang.

Hajah Fatimah terpaksa melawat gelanggang-gelanggang yang 'berselerak' di seluruh negara. "Bukan apa-apa... cuma 'memperkas' mana yang perlu. Yang kurang ditambah — kalau ada yang silap dibetulkan...."

### Berfikir

Bila masa dan keadaan mengizinkan, Hajah Fatimah akan mengikut suaminya melawat gelanggang Pertubuhan Seni Silat Lincak.

Tugas beliau tidak menjejaskan tanggungjawabnya sebagai isteri dan ibu. Persefahaman kukuh antara dua jiwa menjalin sikap bertolak ansur. Anak hanya seorang puteri, Nor Azizah yang kini berusia 10 tahun. Ia mewarisi rasa cinta kepada seni silat dari ayah ibu.

Ujar Hajah Fatimah, ilmu tidak mengenal usia. Memang elok kalau anak-anak muda menabur minat dalam bidang silat. Dunia muda penuh cabaran. Hidup penuh gelora. Kalau jiwa penuh disiplin, mereka pasti tabah dan cekal menghadapi arus hidup.

"Ilmu silat memang mengasah pemikiran. Kita bukan saja mesti tangkas gerak-geri tapi harus cepat berfikir. Kalau musuh itu pantas, kita mesti lebih dari itu. Kita harus mampu 'menilik' apa tindakan musuh seterusnya.

### 22 DEC 1982

"Kaum... kita mungkin lemah. Kalau nak suruh lawan tumbuk, tak tentu menang. Rahsianya terselit dalam kecerdasan berfikir serta ketangkasan gerak laku. Kalau kita tahu apa yang hendak dilakukan musuh, tentu kita bertindak sewajarnya untuk 'mematikan' langkah tersebut...."